



He mea rāhui tae noa ki te 5am, 8 o Pēpuere 2022

## **Kua whakarewahia he rangahau nui mō ngā pānga o te KOWHEORI-19 i Aotearoa**

Kua whakarewahia he rangahau ā-motu hei tātari i ngā pānga o te KOWHEORI-19 ki ngā tāngata i Aotearoa i tēnei rā e Te Herenga Waka.

Ko te whai a te rangahau "Ngā Kawekawe o te Mate Korona", he mea utu e Te Manatū Hauora, he uiui i ngā tāngata 16 tau, pakeke atu i pāngia e te KOWHEORI-19, he kēhi rānei e whakapaetia ana, i mua i te 1 o Tīhema 2021.

Ka whakapā atu ki ngā tāngata tata ki te 9,000 e āhei ana mā te reta me te patowaea i roto i ngā wiki e rua nei e tono ana i rātau kia whakaotihia ngā rangahau tuihono mō ō rātau wheako KOWHEORI-19 me ngā ratonga hauora i whiwhi rātau.

E ārahina ana te rangahau e Tākuta Lynne Russell (Ngāti Kahungunu, Rangitāne, Kāi Tahu, Ngāti Porou) rāua ko Tākuta Mona Jeffreys, ā, kei te ārahi i tētahi rōpū rangahau pūkenga maha, ko te nuinga nō Te Hikuwai Rangahau Hauora o te Whare Wānanga. Ko tākuta Marianna Churchward (Lotofaga, Faleasiu, Hāmoa) kei te ārahi i te wāhanga o Te Moananui-a-Kiwa o te rangahau.

“Ko te hiahia kia tino maha rawa ngā tāngata ka uru mai ki ngā uiui kia mārāma ai mātau ki ō rātau wheako o te KOWHEORI-19 me te tātari i te whaitake o ngā ratonga i whiwhi rātau,” te kī a Tākuta Russell.

Ka whakahaerehia anō ngā uiui me ngā mōrehu o te KOWHEORI-19 i roto i tēnei rangahau.

Ko ngā kitenga ka puta i te rangahau ka whakamahia hei tuku tūtohutanga ki Te Manatū Hauora me pēhea e pai ake ai te tautoko i te hunga e pāngia ana e te KOWHEORI-19 me te whakapai ake i ngā ratonga hauora ā muri ake.

E hāngai ana ngā pātai rangahau e tonoa ai ngā kaiwhakauru ki te whakautu ki ngā wāhanga e whā:

- ngā tautoko i whiwhi rātau (me ērā i hiahia rātau) i te whakataunga tuatahi kei te pāngia e te KOWHEORI-19, ā, i pēhea te pānga o tēnei āhuratanga ki a rātau me ō rātau whānau
- tō rātau wheako i te pāngiatanga e te KOWHEORI-19 me te kounga o ngā ratonga hauora i toroa e rātau
- ngā utu ā-pūtea o te KOWHEORI-19 ki a rātau me ō rātau whānau, ā, ko wai te hunga (mēnā i reira tētahi) i āwhina ki te tiaki i a rātau
- I whai pānga tonu te KOWHEORI Roa me ngā tohumate ki tō rātau ki tua atu o te marama tuatahi o te pāngiatanga e te mate.

I kī a Tākuta Russell ko ngā pānga o te KOWHEORI-19 ki ngā hapori Māori, Te Moananui-a-Kiwa, hauā hoki tētahi arotahi nui o te rangahau.

Ko Jenene Crossan, ko ia te kēhi KOWHEORI-19 37 i Aotearoa, tētahi o te hunga kua rēhita ki te whakauru mai ki te rangahau, ā, tokowhā rātau i pāngia e te KOWHEORI-19 kei te tohutohu i te rōpū rangahau.

I pā mai te KOWHEORI-19 ki a Jenene i te tau 2020, ā, kei te pāngia tonu ia e ngā tohumate o te KOWHEORI Roa. Kei te whakatenatena ia i ētahi atu kua pāngia e te KOWHEORI-19 kia whakauru mai ki te rangahau.

"Ka nui atu tā tātau huihui mai kia mārama ai ki ngā pānga o te mate ki a ngāi tātau, ka pai ake tā tātau manaaki me te tiaki i ā tātau tamariki me ō tātau whānau."

"Kāore pea e rata ki te tangata te whakaputa kōrero, engari koinei te mahi tika, ā, ko te tūmanako ka whai hua te hunga ka whakaputa kōrero," te kī a Jenene.

Ka noho matatapu ngā mōhiohia ka tukuna mai e ngā kaiwhakauru mai ki te rōpū rangahau, te kī a Tākuta Jeffreys.

"Kei te mōhio mātau e manauhea ana ētahi ki te tuku mōhiohia nā te whakamā e pā ana ki te mate KOWHEORI-19. He kōrero whakaū tēnei kia mōhio ai ngā kaiwhakauru ka noho matatapu ō rātau ingoa, engari anō mēnā ka whakaae rātau kia whakaputaina aua mōhiohia," tana kī mai.

Ko te hunga ka hiahia ki te whakauru me haere ki <https://covid.aotearoa.com>. Tērā rānei, me waea atu ki 0800 800 581, īmēra rānei ki [covid.aotearoa@vuw.ac.nz](mailto:covid.aotearoa@vuw.ac.nz).

**Mō ētahi atu mōhiohia, whakapā atu ki a [Tākuta Lynne Russell](mailto:lynne.russell@vuw.ac.nz) i [lynne.russell@vuw.ac.nz](mailto:lynne.russell@vuw.ac.nz), ki 022 359 8212 rānei, [Tākuta Mona Jeffreys](mailto:mona.jeffreys@vuw.ac.nz) rānei i [mona.jeffreys@vuw.ac.nz](mailto:mona.jeffreys@vuw.ac.nz), i 027 418 7455 rānei, Tākuta Marianna Churchward rānei i [marianna.churchward@vuw.ac.nz](mailto:marianna.churchward@vuw.ac.nz), i 027 727 3870 rānei.**

**E wātea ana ētahi atu kōrero anō mai i te hunga i roto i te rangahau i [konei](#).**

---

## **Ngā Pātai me Ngā Whakautu o te Rangahau**

### **P: He aha te kaupapa o tēnei rangahau?**

W: Ko te whai a te rangahau Ngā Kawekawe o te Mate Korona" he rapu kia mārama ki ngā wheako o te hunga i pāngia e te KOWHEORI-19, he kēhi e whakapaetia ana rānei. Kei te hiahia ngā kairangahau ki te mōhio mō te pānga o te KOWHEORI-19 ki te hauora me te oranga o ēnei tāngata me ō rātau whānau.

Kia mōhio: ko te "kēhi e whakapaetia ana" he tangata tērā i pāngia tonutia pea e ngā tohumate me te whaipānga ki tētahi kēhi e mōhiohia ana, engari kāore i whakaūngia e te whakamātautau (i te mea kāore ia i whakamātautauhia, i kitea e ngā otinga whakamātautau rānei kāore i te mate).

### **P: Ko wai ka āhei ki te whakauru mai?**

W: Ko ngā tāngata katoa i Aotearoa 16 tau, pakeke atu hoki, ā, i pāngia e te KOWHEORI-19—he kēhi rānei i whakapaetia—i mua i te 1 o Tīhema 2021 ka āhei ki te whakauru mai. Kei roto i tēnei ko te hunga i pāngia i te tīmatanga o te mate urutā, nō nā tata rānei, tae atu ki te hunga i pāngia e te KOWHEORI-19 i tāwāhi i mua i te hokinga mai ki Aotearoa.

### **P: Me pēhea taku whakauru mai?**

W: Ka taea e te hunga e āhei ana te whakaoti i ngā uiui i <https://covid.aotearoa.com>. E whā ngā uiui: ka āhei ngā kaiwhakauru ki te whakaoti i te rahinga e hiahia ana rātau, i ērā anake rānei e hāngai ana ki a rātau. Ko te hunga e hiahia ana ki te whakauru mai me waea atu ki 0800 800 581, me īmēra rānei ki [covid.aotearoa@vuw.ac.nz](mailto:covid.aotearoa@vuw.ac.nz).

### **P: Ka ahatia ngā mōhiohia a ngā kaiwhakauru?**

W: Ka haumarū te rokiroki i ngā mōhiōhio ka kohia mai i ngā kaiwhakauru. Ko ngā mema anake o te rōpū rangahau ka āhei atu ki ngā raraunga. Kāore e mōhiotia ngā kaiwhakauru mai i ngā otinga, engari ia mēnā ka tukuna e rātau tā rātau whakaaetanga kia whakaputaina ēnei mōhiōhio.

**P: Ka pēhea te whakamahi i ngā otinga?**

W: Ka whakamahia ngā otinga hei tuku tūtohutanga ki Te Manatū Hauora me pēhea e pai ake ai te tautoko i te hunga e pāngia ana e te KOWHEORI-19.

**P: Ko wai kei te utu i te rangahau?**

W: He mea utu te rangahau e Te Manatū Hauora. \$1.2 miriona te nui, mō te 12 marama, i tukuna ki Te Herenga Waka mō te rangahau. Ko Te Hikuwai Rangahau Hauora, nō Te Wāhanga Tātai Hauora o te Whare Wānanga kei te ārahi i te rangahau.

---

He mea whakaputa e te kaitohutohu matua a Te Herenga Waka—ihirangi pāpāho a Jessica Wilson: [jessica.m.wilson@vuw.ac.nz](mailto:jessica.m.wilson@vuw.ac.nz) or 021 837 742

**Me whai i te Whare Wānanga i runga [Pukamata](#), [Kapoata](#), [LinkedIn](#) me [Tihau](#)**

**University name: The University's full name is Te Herenga Waka—Victoria University of Wellington. Where space constraints require our name to be abbreviated, please retain the word 'Wellington' to ensure our location is clear to readers.**

**CAPITAL THINKING.  
GLOBALLY MINDED.**  
MAI I TE IHO KI TE PAE